

1496.

499

frieslandt rede unde geschickeden unde sine frunde, deselven van Hamborch unde Bremen scholen dan oock erkennen van den guederen, de juncker Edo der greven underdanen hevet laten nemen, unde desglyken wederumb den sinen van den genompten greven genomen, wo sick der aller sall geboren. Vurder is gefunden, dat juncker Edo noch de sine in ghener wise sick scholen strecken an Knypense noch Inhuesen ore herlicheiden, underdanen noch tobehoringe, de gebreke sin dan ersten vurmiddelst gueden frunden, dairinne compromittert mit einen overmanne, tuschen dit unde Michaelis negest anstainde fruntlich ader rechtlich erkannt, unde wes erkannt werdt, sall ein jeder part sunder wederropen volgich sin. Meer dat de gebreke tuschen juncker Eden unde Hicken to Godensen, we de sin, scholen durch guede frunde erkannt in rechte ader fruntschupp van beiden siden dair genslichen by to blivende, bygelacht werden, alls de eine deme anderen sodans 14 dage vurwittiget. Inn gelyker mate sall oock geschien in den gebreken, als juncker Ede anlaget Senwarden, unde Folef weder claget upp juncker Eden, wo de clage oock mogen sin. Vurder iss umme frede unde wolvairt des gemeynen koupmanns gededinget, dat juncker Edo na desen dage nemandt sall noch will to zewart laten beschedigen, dat en sy dan ersten vurschreven voir den gemelten greven unde steden Bremen unde Hamborch etc. Vurder sall unde will junckher Edo alle gudere, wo de oock sin, de an sine gebede, strande ofte eylande slain unde komen, deme koupmanne up geboirlich ber(g)gelt weder volgen laten, sunder jenige vurder bezweronge na older gewonheit. Ouck ofte jemant were van der gemelten greven undersaten unde bewanten, de jenighe ansprake oder clage hedden up junckher Eden ofte de sine, dat sy dan van erfgedern, schult ofte anders, wo de oock moghen sin, den sall he unvortoget recht doen unde laten wedderfaren, unde in gelyker mathe sall den sinen wederumb geschien by den gemelten greven. Ouck sall unde will juncker Edo de twee unde viffich gevangen van Schortensen, de im levende unde in siner macht sin, nu ame midweken negestkomende schicken to Awrig, in bywesende derghenen, den de gelegenheit is bewust, wo de gevangen sin gegrepen, van juncker Eden dairby geschicket, unde dat de greven dan selver erkennen, wes eerlich unde geboirlich sy mit den gevangen. Vurder sall unde will juncker Edo bestellen, dat de achterstellinge kentliche dingetaill den gemelten greven mit den ersten vurnoget werde. Hirmede alle unwille der veide halven hen gestallt sall sin; de eine mach in des andern lanndt unde herlichkeit riden, varen, gaen, stain, komen, varen, handelen unde vurkeren na older sede unde gewonheit, unde ofte juncker Edo sick sprake vurmodet to hebben up de Vredeborch, so one de genompten greven nicht en bestain, de mach he mit rechte ervorderen, unde juncker Edo hirmede unde de sine na older gewonheit unvorkortet to blivende, unde mit desen punten scholen andere verbunde unde tohopesate, als de genompte junckher Edo mit sinen heren unde frunden hevet angenommen, unvorbroken syn, unde want wy Edezzart, greve to Oestfrieslant etc, unde Edo Wymeken, to Jhever hovetling, alle voirgescreven punte unde artikell in mathen durch unse rede unde frunde voirbenompt gededinget unde vurhandelt, belevet hebben, dairumme hebben wy malckander der veide halven de soene personlich selves mit hanttastinge gegeven unde genomen, unde unse segelle witlichen an dese soenbreve heten hangen; unde to merer vestonge aller voirgescreven saken, dat de all so vurhandelt unde van den principalen parten belevet unde bevestiget sin, hebben wy Egbertus, abt to Tedingen, Hicko van Dornhum provest, Edzart to Peuweshem unde Ubbo to Uplewarden, hovetlinge, rede unde frunde der genompten greven to Oestfrieslant, unse segelle, unde wy Johannes Renis sindicus, Hinrich Stenauwe borgemeister, Albert Leuwen raidt-

63*